

**Evening Dogri News**  
**28<sup>th</sup> September 2024**  
**1815 hrs**

**Headlines**

- 1 प्रधानमंत्री नरेन्द्र मोदी होरें गलाया जे जम्मू कश्मीर दे लोक शांति ते बेहतर भविकख चांहदे न।
- 2 जम्मू कश्मीर च असेंबली चुनाएं दे त्रीए ते खीरले गेड़ लेई अभियान कल समाप्त होआ'रदा ऐ।
- 3 कुलगाम च होए दे टाकरे च सुरक्षा बलें दऊं आतंकवादिएं गी मारी मकाया ते 5एं घायल होए दे लोकें च 4 सेना दे जवान न।
- 4 बटोत-किश्तवाड़ जरनैली शिड़क हादसे च 2 लोकें जान मुहाई ते इक जख्मी होआ।

<><><><><><>

**JK PM Rally**

बीजेपी दे वरिष्ठ लीडर ते प्रधानमंत्री नरेन्द्र मोदी होरें अज्ज आखेआ ऐ जे जम्मू कश्मीर दे लोक रमानदारी ते अपने बच्चें लेई बेहतर भविकख चांहदे न। आकाशवाणी दे जम्मू संवाददाता नै जानकारी दित्ती ऐ जे अज्ज जम्मू च इक चुनां रैली गी संबोधत करदे होई मोदी होरें आखेआ जे जम्मू कश्मीर विधानसभा चुनाएं दे पैहले दऊं गेड़ें च भारी गिनतरी च लोकें आस्सेआ वोट पाए जाने, एहू साबत करदा ऐ जे इत्थूं दे लोक अमन ते खुशहाली चांहदे न ते भारतीय लोकतंत्र च उंदा गैहरा विश्वास ऐ। प्रधानमंत्री होरें अग्गे आखेआ जे जम्मू कश्मीर दे लोक त्रऊं परोआरें- कांग्रेस, नैशनल कांफ्रेंस ते पीडीपी कोला तंग आई चुके दे न ते ओहू इत्थें परतियै भ्रष्टाचार ते फर्कोफर्की आली बवस्था नेई चांहदे। उनें आखेआ जे लोक इत्थें बीजेपी दी सरकार चांहदे न जिन्नै इत्थें रमानदारी, तरक्की ते खुशहाली दे इक नमें दौर दी शुरूआत कीती ऐ। प्रधानमंत्री होरें 2016 च अज्जै दे रोज पाकिस्तान दे खलाफ कीती गेदी सर्जिकल स्ट्राइक आली कारवाई गी चेता करदे होई आखेआ जे इस्सै रोज भारत नै पाकिस्तान दे अंदर बढियै आतंकी ठकाने गी तबाह कीता हा।

<><><><><><>

**PM OROP**

प्रधानमंत्री नरेन्द्र मोदी होरें कांग्रेस पर अरोप लाया जे उन्नै मुल्खै लेई अपनी जिंदू दा बलिदान देने आलें दा कदें मान नेई कीता ते ओहूदे राज च साढ़े फौजिएं दे परोआर वन रैंक वन पैशन लेई तरसदे रेह। आकाशवाणी दे जम्मू संवाददाता मूजब अज्ज जम्मू च अपनी चुनां रैली च मोदी होरें आखेआ जे 2014 च उंदी सरकार बनने दे बाद "वन रैंक वन पैशन" लागू कीता गोआ ते अजें तोड़ी फौजी परोआरें गी 1 लख 20 ज्हार करोड़ रपे हासल होई चुके दे न।

<><><><><><>

## NC-Omar

नेशनल कांफ्रेंस दे उप-अध्यक्ष ते बडगाम ते गांदरबल थमां पार्टी मेदवार उमर अब्दुल्ला नै बीजेपी दे लीडरें दे दावें गी खारज करी दित्ता जे जम्मू कश्मीर च अगली सरकार ओह बनांगन। अज्ज कुपवाड़ा च पत्रकारें कन्नै गल्लबात करदे होई उमर अब्दुल्ला होरें आखेआ जे बीजेपी इत्थें कदें सरकार नेई बनाई सकदी की जे जम्मू कश्मीर दे लोक घाटी च बीजेपी दी कठपुतलियें दे तौरा चुनां मैदान उमरे दे मेदवारें गी खरी खल्ली पंछानदे न।



## JK Campaign

जम्मू कश्मीर च विधान सभा चुनाएं दे त्रीए ते खीरले गेड़ लेई अभियान कल समाप्त होई जाग। 40एं असैंबली सीटें लेई चुनाएं दा खीरी गेड़ पैहली अक्टूबर गी होग जेहदे च जम्मू खित्ते दी 24 सीटां न। इंदे च जम्मू जिले दे 11 हल्के, कठुआ जिले दे 6, उधमपुर जिले च 4 ते सांबा जिले च 3 हल्के न। आकाशवाणी जम्मू संवाददाता हुंदी रिपोर्ट मूजबराजनीतिक पार्टियां मतदाताएं गी प्रेरित करने आस्तै रोड शो, गल्लबात ते रैलियें दा आयोजन करा रदियां न। जित्थे इक बक्खी प्रधानमंत्री होरें जम्मू च इक बड्डी चुनावी रैली गी संबोधित कीता उत्थे गै दुई बक्खी साबका मुखमंत्रि ते डेमोक्रेटिक प्रोग्रेसिव आजाद पार्टी दे प्रधान गुलाम नबी आजाद ते कांग्रेस नेता प्रियंका गांधी होरें बी जम्मू खित्ते च चुनावी रैलियें गी संबोधित कीता। गुलाम नबी आजाद होरें चुनावी रैली दरान दफा 370 दे मसले पर नेशनल कांफ्रेंस ते कांग्रेस पर जबानी हमला कीता। उनें आखेआ जे छड़ा भारत सरकार गै जम्मू-कश्मीर गी विशेष अखितयार देने आहले इस कानून गी परतियै ब्हाल करी सकदी ऐ। जम्मू च पत्रकारें कन्नै गल्ल करदे होई आजाद होरें आखेआ जे प्रधानमंत्री नरेन्द्र मोदी ते गृह मंत्री अमित शाह होरें जम्मू-कश्मीर दा राज्य दा दर्जा ब्हाल करने दा पैहले गै वायदा कीते दा ऐ ते कांग्रेस दा एहदे कन्नै किश लैना-देना नेई ऐ। उनें आखेआ जे नां ते नेशनल कांफ्रेंस ते नां गै पीडीपी नै संसद च दफा 370 ते राज्य दा दर्जा ब्हाल करने बारै किश आखेआ ऐ ते असलियत एह ऐ जे इनें कोई राज्य नेई छड़ी भारत सरकार गै ब्हाल करी सकदी ऐ। कांग्रेस नेता प्रियंका गांधी होरें बिश्नाह च चुनावी रैली कीती। उनें आखेआ जे लेफ्टिनेंट गवर्नर मनोज सिन्हा होर आपूं बाहरै दे न ते ओह जम्मू-कश्मीर दे आम लोकें दे मसलें गी हल नेई करै करदे। उनें आखेआ जे जम्मू-कश्मीर लेई मुकामी नेता दी लोड़ ऐ जेहड़ा इत्थुं दे लोकें दियें समस्याएं ते दिक्कतें-परेशानियें गी हल करोआई सकै।



## CEO Pole

औंदे विधानसभा चुनाएं दी तैआरियें दे चलदे मुख्ख चुनां अधिकारी पी.के.पोले होरें सांबा जिले दा दौरा कीता ते उत्थें स्वीप दे हेठ होआ रदे मतदान जागरूक समारोह च हिस्सा लैता। उनें जिले च चुनाएं लेई चला रदी तैआरियें दा बी जायजा लैता ते चुनां समग्री जारी ते हासल करने आले केन्द्रें ते कंट्रोल रूम जेहड़े जिले च चुनाएं दी तैआरियें लेई बनाए गेदे न, उंदा बी निरीक्षण कीता।



## LG Sheetal Devi

उपराज्यपाल मनोज सिनहा होर अज्ज पैरिस पैरा आंलपिक्स च कैंह दे तगमे हासल करने आले शीतल देवी ते राकेश कुमार हुंदे कन्नै जम्मू च राजीवन च मिले। उनें इनें तीरांदाजी गी ममारकबाद दित्ती ते गलाया जे उंदी मेहनत ते लगन कन्नै गै उनें अंतर्राष्ट्रीय स्तर उप्पर तगमें जित्तिथै मुलखै दा नां रोशन कीता ऐ। उपराज्यपाल होरें तीरदांज कोच अभिलाषा चौधरी होरें गी बी सम्मानत कीता। श्री माता वैष्णो देवी श्राईन बोर्ड दे सीईओ अंशुल गर्ग ते होर आला अधिकारी बी इस मौके पर मजूद हे।

<><><><><><>

## PM-MKB

प्रधानमंत्री नरेन्द्र मोदी होर मन की बात कार्यक्रम राएं अपने बचार देश ते बाहरे मुल्खें दे लोकें कन्नै सांझा करगंन। एह कार्यक्रम कल यानि 29 सितम्बर गी बडलै 11 बजे आकाशवाणी पर प्रसारत कीता जाग। इस म्हीनेवार कार्यक्रम दी एह 114मीं किश्त होग। त्रीह बारी प्रधानमंत्री बनने परैंत प्रधानमंत्री हुंदे इस कार्यक्रम दी एह चौथी किश्त होग। मन की बात कार्यक्रम दा प्रसारण सारे आकाशवाणी ते दूरदर्शन नेटवर्क, ए.आई.आर वैबसाइट, न्यूज़ ऑन एयर मोबाइल ऐप पर कीता जाग। एयर न्यूज़, डीडी न्यूज़, प्रधानमंत्री हुंदे दफ्तर ते सूचना ते प्रसारण मंत्रालय दे यूट्यूब चैनलें पर बी इस कार्यक्रम दा सिद्दा प्रसारण कीता जाग। आकाशवाणी दे क्षेत्रीय चैनलें दे बाद इंदा मकामी भाषाएं च अनुवाद प्रसारत कीता जाग।

<><><><><><>

## Kulgam Encounter

इक अधिकारी दी जानकारी मूजब दक्खन कश्मीर दे कुलगाम जिले दे आदिगाम इलाके च अज्ज चला'रदी गोलीबारी च 2 आतंकवादिएं गी मारेआ गेआ। इक आला पुलस अधिकारी नै एह जानकारी दित्ती ऐ जे 2 आतंकवादिएं गी हुनै तोड़ी मारेआ गेआ ऐ ते इंदी पंछान हुनै तोड़ी नेई होई ऐ की जे गोलीबारी अजें चला'रदी ऐ। गोलीबारी दी शुरुआत च सेना दे 4 जवान ते इक पुलस अधिकारी जेहडे कुलगाम दे एएसपी न, ओह घायल होए। एह 5एं लोक लोक इसलै ठीक न ते इंदा इलाज सेना दे अस्पताल च चला'रदा ऐ। पुलस ते सेना दी टीम नै इलाके च तपाशी अभियान जारी कीता ऐ।

<><><><><><>

## India-Pak UN

संयुक्त राष्ट्र महासभा च पाकिस्तान दे प्रधानमंत्री शाहबाज शरीफ हुंदे राएं जम्मू कश्मीर दा जिक्र कीते जाने पर भारत नै कड़ी प्रतिक्रिया दित्ती ऐ। भारत नै आखेआ ऐ जे सैनिक शासन, आतंकवाद, नशीले पदार्थें दी तस्करी ते अंतर्राष्ट्रीय अपराधें आस्तै पूरी दुनिया च बदनाम पाकिस्तान जनेहा मुल्ख दुनिया दे सब्बने शा बड्डे लोकतंत्र दी आलोचना करा'रदा ऐ। संयुक्त राष्ट्र महासभा च इक सत्र गी संबोधत करदे होई भारतीय राजनायिक भाविका मंगलानंदन होरें गलाया जे पूरी दुनिया गी पता ऐ जे पाकिस्तान केई चिरे थमां गै अपने गंवादिएं दे खलाफ बन्ने पार थमां आतंकवाद गी इक थेआरे दे रूपै च इस्तेमाल करा'रदा ऐ। उनें इब्बी आखेआ जे पाकिस्तान गी एह समझी लैना लोड़चदा जे भारत खलाफ बन्ने पार थमां आतंकवाद गी बढ़ावा देने दा अंजाम उसी भुगतना होग।

## Doda Mishap

अज्ज बटोत-किशतवाड़ जरनैली शिड़क उप्पर धास्सू दे कोल इक शिड़क हादसा होआ जेहदे च दऊं लोकें जान मुहाई ते इक जख्मी होआ। साढ़े डोडा दे आकाशवाणी संवाददाता फ़ैयाज पाम्पुरी हुंदी रिपोर्ट मूजब इस हादसे च पीड़ित होए दे लोक आल्टो कार च सुआर हे, जेह्डी शिड़कै उप्परा रूलकियै चिनाब दरेया दे कंडे जाई पेई। जान मुहाने आलें च इक 18एं बरें दासरूर ग्रां दा सुमाया तबस्सुम ऐ ते दूआ द्रावशाला दा इमरान हुसैन नां दा शख्स ऐ। तोआई जख्मी होई दी इकरा बानू गी जीएमसी डोडा च पजाया गेआ।



## PM HM Tributes

अज्ज महान स्वतंत्रता सेनानी अमर शहीद सरदार भगत सिंह हुंदी जनम जयंति ऐ। इस मौके मुल्ख भरै च उनेंगी श्रद्धांजलि देने लेई केई कार्यक्रमें दा सरिस्ता कीता जा'रदा ऐ। प्रधानमंत्री नरेन्द्र मोदी ते गृहमंत्री अमित शाह होरें इस मौके उनेंगी श्रद्धांजलि भेंट कीती। इक सोशल मीडिया पोस्ट पर मोदी होरें शहीद भगत सिंह होरें गी नमन करदे होई आखेआ जे ओह इक ऐसे अमर स्वतंत्रता सेनानी हे जिनें मातृभूमि दी शान ते सम्मान दी खातर अपनी जिंदू दा बलिदान देई दितता हा। गृहमंत्री होरें बी इस महान शहीद क्रांतिकारी गी चेता करदे होई आखेआ जे उनें अपनी हिममत, दलेरी ते देशप्रेम दी ताकत दे बल पर ना छड़ा अंग्रेजी हकूमत गी ललकारेआ हा सगुआं देश दी अजादी ते सनैहरे भविकख लेई अपनी जिंद-जान कुर्बान करी दित्ती ही। शाह होरें आखेआ जे भगत सिंह हुंदे बलिदान नै अजादी दी लड़ाई गी बड़ी मती ताकत दित्ती।



## Lata

अज्ज स्वर कोकिला लता मंगेशकर हुंदी 95मीं जयंति ऐ। 28 सितम्बर 1929 गी इंदौर च पैदा होई दी इस महान गायिका नै केई दहाकें तगर अपनी दिलकश अवाज कन्नै करोड़ें लोकें गी मंत्रमुग्ध कीता ते उंदे गीए दे गीत सदा सदा लेई इक अनमोल खजाने दे रूपै च अमर होई गे। गायकी दे अपने 70 बरें कोला बी लम्मे सफर दरान उनें केई भाषाएं च 25 जहार कोला मते गीतें गी अपनी जादुई अवाज दित्ती। भारत रत्न कन्नै सम्मानित इस महान गुलूकारा नै बनसबबनताएं भरोची अपनी गायकी दी शेली कन्नै केई पीढ़िएं गी प्रेरत कीता ते अग्गे बी करदियां रौंहगन। 6 फरवरी 2022 गी 92एं बरें दी उमरी च उंदा काल होई गेआ हा। प्रधानमंत्री नरेन्द्र मोदी होरें लता मंगेशकर होरें गी उंदी जयंति दे मौके पर चेता करदे होई आखेआ जे अपने भावें भरोचे गीतें दे कारण ओह सदा सदा लेई लोकें दे दिलें पर राज करदियां रौंहगन। अपने सनेए च उनें आखेआ जे उंदा हिर्ख ते शीरवाद हासल करियै ओह अपने आपै गी मता भागें आला समझदे न।

